

# Forskrift om vass- og avløpsgebyr i Bjørnafjorden kommune

---

Heimelsgrunnlag: Kommunestyrevedtak 13.02.2025, sak 13/2025 med heimel i forskrift 1. juni 2004 nr. 931 om avgrensing av forureining (forureiningsforskrifta) § 16-1, jf. lov 16. mars 2012 nr. 12 om kommunale vass- og avløpsanlegg § 5, jf. § 4.

## § 1 Formålet med forskrifa

Abonnentane i kommunen betaler for vass- og/eller avløpstenester levert av kommunen. Tilhøvet mellom abonnementen og kommunen er regulert av lover og forskrifter og av lokale reglement, føresegner, regulativ og deklarasjonar.

Vass- og avløpsgebyr sikrar finansiering av utbygging, drift og vedlikehald av kommunen sine vass- og avløpsanlegg, og skal gi ei best mogleg fordeling av kostnadane blant brukarane.

Denne forskrifta gjeld alle abonnementar i kommunen, sjå definisjon av abonent under §2. Forskrifta fastset utrekninga og innbetaling av dei gebyra abonnentane skal betale for vass- og avløpstenestene kommunen leverer.

## § 2 Definisjonar

Abonent: tinglyst eigar av eigedom som er tilknytt kommunal vassforsyning- og/eller avløpsanlegg, eller som er godkjent eller kravd tilknytt, direkte eller gjennom privat stikkleidning. Tinglyst eigar er også abonent ved utleige av eigedom.

For bortfesta eigedom betalar festar i staden for grunneigar.

Festar: festar av fast eigedom der festeavtalen ikkje er tinglyst, men der festaren eig bygningar som er plassert på tomta, og bruker festerett slik det går fram av tomtefestelova.

Der bustad og næring er knytt til felles gards- og bruksnummer skal dei ha kvart sitt abonnement.

- Abonnementsgebyr: den faste delen av årsgebyret, som skal dekke ein del av dei faste utgiftene til kommunen for vass- og/eller avløpstenester.
- Bruksareal (BRA) etter NS 3940 (registrert i matrikkelen):  
Bruksarealet er arealet innanfor dei omsluttande veggane i bustaden og fellesarealet som høyrer til bustaden, utanfor veggane i bustaden. Bueining: bustad eller fritidsbustad/hytte med separat inngang, eitt eller fleire oppholdsrom, kjøkkendel og bad eller wc.
- Brukseining: ei brukseining kan vere ein bygning, for eksempel kontorbygg, eller fleire bygningar, f.eks. sjukehus. Det kan òg vere ein bygning, f.eks. bueining (bustad og fritidsbustad/hytte) kontoreining, eller f.eks. avdeling eller post på sjukehus.
- Eigedom: fast eigedom registrert som sjølvstendig gards- og bruksnummer og eventuelt seksjonsnummer i matrikkelen. Seksjon etablert i tråd med lovgivinga om eigarseksjonar blir rekna som sjølvstendig eigedom.
- Eingangsgebyr for tilknyting: gebyr for etablering av abonnement på vass- og avløpstenester ved tilknyting til kommunal leidning, anten direkte eller via privat stikkleidning.
- Felles privat stikkleidning: privat leidning eigd i fellesskap av abonnementar som er tilknytt det

kommunale leidningsnettet.

- **Forbruksgebyr:** den variable delen av årsgebyret som blir betalt etter forbruk (målt eller stipulert).
- **Gebyrregulativet:** den gjeldande prisoversikta for vass- og avløpsgebyr i kommunen. Satsane i gebyrregulativet blir oppdaterte årleg gjennom vedtak i kommunestyret.
- **Nybygg:** einebustad, fritidsbustad, næringsbygg og andre bygg med endra status til mellombels bruksløyve eller ferdigattest.
- **Næringsseining:** sjølvstendig lokale som blir nytta til næringsverksemde eller offentleg verksemde. Næringsseining omfattar alle andre bygg enn bustadbygg, også frisørsalongar, familiebarnehagar mm, i private bustader.
- **Offentleg verksemde:** verksemde driven av staten, fylket eller kommunen.

### **§ 3 Gebyrplikt**

Plikt til å betale vass- og/eller avløpsgebyr gjeld for alle abonnentar i kommunen. Eigar av fast eidegom er ansvarleg for gebyra. For eidegom som er bortfesta, betalar festaren, med mindre anna er avtalt og så lenge det er minst 30 år igjen av festetida rekna frå tidspunktet gebyrplikta oppstår. Det same gjeld der festaren etter avtale har rett til å krevje festet forlenga for så lang tid at samla festetid som står att blir minst 30 år.

### **§ 4 Gebyrtypar**

Følgjande gebyrtypar gjeld for både vass- og avløpstenester:

- Eingongsgebyr for tilknyting
- Årsgebyr (abonnementsgesbyr og forbruksgesbyr)
- Gebyr for mellombels tilknyting
- Gebyr for plombering, stenging og gjenopning av vassforsyning
- Gebyr for leige av vassmålar
- Gebyr for kontroll/avlesing av vassmålar

## Kapittel 2 Eingongsgebyr

### **§ 5 Eingongsgebyr for tilknyting**

Ved tilknyting til kommunale vass- og avløpsleidningar skal det betalast eingongsgebyr, jf. lov om kommunale vass- og avløpsanlegg § 3. Fråkopling og eventuell ny tilknyting må utførast av godkjent røyrleggjar (røyrleggjarmelding/sanitærtilkopling skal sendast til kommunen).

Eingongsgebyret for tilknyting skal betalast ved:

- oppføring av nybygg som blir tilknytt offentleg vass- og/eller avløpsleidning
- eksisterande bygg som blir tilknytt eller bygg som er pålagt tilknyting i medhald av lov, der fristen for tilknyting er ute.
- tilbygg eller nye bygningar på eidegom når det nye bruksarealet er over 50 m<sup>2</sup>
- eksisterande bygg med tilknyting som ikkje er godkjent. (Dette inneber ikkje at kommunen har godkjent tilkoplinga).
- anna permanent tilknyting til kommunalt vass- eller avløpsanlegg, f.eks. vatningsanlegg for landbruk, idrettsanlegg, m.v.

Ved riving av eksisterande bygning, der nytt bygg blir sett opp på same stad, skal det betalast eit mellomlegg dersom nybygget har større areal enn det som blei rive.

Eingongsgebyret for tilknyting blir ikkje betalt i følgjande tilfelle:

- Bygg med mellombels tilknyting, f.eks. brakkerigg
- Særskilt tilknyting av sprinklaranlegg

## § 6 Gebrysats og betaling

- Eingongsgebyret for bustadeigedomar og næringseigedomar skal betalast etter bruksareal.
- For eksisterande bygningar blir faktura for tilknytingsgebyr sendt ut ved godkjent sanitærabonnement etter sats i gjeldande gebyrregulativ på tidspunktet for godkjenning.
- For nybygg blir faktura sendt ut ved godkjent igangsetjingsløye etter sats i gjeldande gebyrregulativ på tidspunktet for godkjenning.
- For eksisterande bygg med tilknyting som ikkje er godkjend, blir tilknytingsgebyr betalt etter gjeldande sats på det tidspunktet krav om tilknytingsgebyr vart sett fram.
- Ein kan inngå særavtalar med næringsverksemder om avvikande eingongsgebyr for tilknyting dersom det blir ekstra høge eller låge kostnader ved etablering av tenesta.
- Kommunen kan innføre eigne gebyr for tilknyting/årsgebyr for ulike område i kommunen.

## Kapittel 3 Årsgebyr

### § 7 Årsgebyr

Årsgebyr skal betalast av alle abonnentar og er sett saman av to delar:

- Abonnementsgebyr
- Forbruksgebyr

For nybygg oppstår gebyrplikt ved mellombels bruksløye/ferdigattest, eventuelt når bygget blir tatt i bruk. For eksisterande bygg oppstår gebyrplikt når bygget blir tilkopla. Dette skal dokumenterast med datert ferdigmelding. Ferdigmeldinga skal godkjennast av kommunen.

### §8 Abonnementsgebyr

Samla abonnementsgebyr for kommunale vasstenester skal dekkje ein fast del av dei forventa kostnadene knytt til vasstenester i kommunen. Resten blir dekt gjennom forbruksgebyret.

Prosentdelen går fram av gebyrregulativet.

Storleiken på abonnementsgebyret og forbruksgebyret blir fastsett årleg av kommunestyret og går fram av gebyrregulativet.

Abonnementsgebyr blir differensiert etter brukarkategori. Alle abonnentar i ein brukarkategori betalar ein like stor fast sum, som går fram av gebyrregulativet.

- Abonnementsgebyr for næring:  
Betalt av næringseigedomar, inkludert landbruk og offentleg verksemder
- Abonnementsgebyr for bustad:  
Betalt av andre abonnentar (bustader og fritidsbustader). Betaling per bueining.

Abonnenten har ansvar for at kommunen har korrekte data om abonnementstilhøvet.

Abonnenten skal melde om endringar i abonnementstilhøvet til kommunen. Fram til kommunen har tatt imot melding, skal abonnenten betale gebyr som før.

## **§ 9 Eigedom utan godkjent tilknyting eller fråkopling**

Er ikkje tilknyting godkjend av kommunen, skal abonnenten betale gebyr frå og med det tidspunktet tilknytinga fann stad. Dersom eigedom er tilknytt utan godkjenning av kommunen, skal abonnenten betale gebyr frå og med det tidspunktet kommunen finn det dokumentert at tilknytinga fann stad.

Er fråkopling ikkje godkjent av kommunen, skal abonnenten betale gebyr fram til fråkoplinga er godkjend.

## **§ 10 Ansvar for gebyra**

Abonnenten har ansvar for betaling av gebyr, uavhengig av om gebyrkravet er retta mot abonnenten eller annan rekningsmottakar.

## **§ 11 Forbruksgebyr**

Forbruksgebyret skal reknast etter målt eller stipulert vassforbruk:

- Målt vassforbruk er basert på bruk av vassmålar som viser faktisk vassforbruk og som blir multiplisert med pris per m<sup>3</sup>.
- Stipulert vassforbruk blir rekna på grunnlag av bruksareal i bygget og multiplisert med utrekningsfaktor m<sup>3</sup> per m<sup>2</sup> bruksareal per år. Kommunestyret set utrekningsfaktor årleg gjennom eige regulativ.

Både kommunen og den enkelte abonnenten kan krevje at forbruksgebyret skal fastsetjast ut frå målt forbruk, med dei avgrensingar som følgjer av denne forskrifta.

Det er uansett krav om vassmålar for:

- Alle nybygg
- Alle bygningar eller delar av bygning som ikkje blir nytta til bustadformål
- Mellombelse abonnentar
- Vassuttak utan at vatn er lagt inn i bygning og vassuttak for ubygde eigedom
- Bustader med basseng, fontene m.m.
- Sprinklaranlegg

I særlege tilfelle der bruksareal ikkje ligg føre, kan kommunen bestemme at abonnenten, for eksempel mellombelse abonnentar for bygg og anlegg, betaler for eit fastsett stipulert forbruk.

For alle abonnentar gjeld at avløpsmengda blir rekna lik som vassmengda. Dersom avløpsmengda frå ein abonnent er vesentleg større eller mindre enn det målte vassforbruket, kan forbruksgebyret for avløp bli basert på målt eller stipulert/utrekna avløpsmengd (utslepp).

Abonnenten må søkje om redusert gebyr og legge fram dokumentasjon på avviket. Kommunen gjer ei skjønnsmessig vurdering utifrå innsendt dokumentasjon.

For næringsverksemde og offentleg verksemde der samansetjinga av avløpsvatnet skil seg frå vanleg

hushaldsavløp, og verkar anten fordyrande eller innsparande på drift og vedlikehald av avløpsanlegget i kommunen, kan ein rekne ut eit påslag/frådrag i forbruksgebyret for avløp basert på dei forventa ekstrautgiftene/innsparingane.

Både kommunen og abonnenten kan krevje at forbruksgebyret blir fastsett ut frå målt forbruk.

## Kapittel 4 Fritak

### **§ 12 Fritak**

Det kan bli gitt fritak frå gebyr for forbruk dersom eigedomen står ubrukt i minst 12 månader samanhengande. Fritak frå forbruk blir gitt for eit år om gongen, det må søkjast om fritak for kvart år. Maksimal periode for fritak er 3 år.

Fritak frå abonnementsgesbyr blir gitt ved dokumentert fråkopling av vatn.

### **§ 13 Grunnlag for reduksjon i gesbyr**

Tilhøve som gir grunnlag for reduksjon i gesbyra:

- Ved ikkje varsle brot i vassforsyninga i meir enn 24 timer
- Ved ikkje varsle brot i vassforsyninga meir enn 2 gonger i løpet av eit kalenderår, og kvart brot varer meir enn 8 timer
- Når hygienisk kvalitet på vatnet er så dårlig at det må kokast før bruk til drikke eller matlaging

Generell tilråding om å koke vatn som sikringstiltak etter trykkfall på grunn av reparasjon, spyling, brannsløkking m.m. gir ikkje gesbyrreduksjon. Vilkår for gesbyrreduksjon er at mangelen skuldast tilhøve på kommunen si side, til dømes forureining i vasskjelde eller feil ved kommunalt anlegg. Restriksjonar for vassforbruk, t.d. forbod mot hagevatning, eller kortare avbrot i levering av vatn eller mottak av avløpsvatn, gir ikkje grunnlag for reduksjon i gesbyra.

Krav om redusert gesbyr må fremjast innan 4 veker etter at tilhøvet oppstod, dersom ikkje kommunen av eige tiltak har fattat vedtak om gesbyrreduksjon.

## Kapittel 5 Mellombels tilknyting

### **§ 14 Mellombels tilknyting**

Mellombels tilknyting gjeld for arbeidsbrakker og andre bygningar av mellombels art med innlagt vatn, som berre skal brukast i ein avgrensa periode.

Eigar/festar av eigedommen skal betale abonnementsgesbyr og forbruksgesbyr etter gjeldande reglar for næringsverksemrd, med avrekning i samsvar med den tida tilknytinga er operativ. Ein skal ikkje betale eingangsgebyr for tilknyting, men alle kostnader ved tilknyting og fråkopling blir belasta eigar/festar av eigedommen.

Mellombels tilknyting gjeld for opp til 1 år, med høve til å søkje om vidareføring. Det er ei

absolutt øvre grense på 3 år. Utover 3 år må ein betale tilknytingsgebyr på normale vilkår. Eingangsgebyr for tilknyting fell til betaling dersom mellombels tilknyting ikkje blir avslutta når kommunen si godkjenning går ut.

## Kapittel 6 Vassmålar

### § 15 Bruk av vassmålar

Vassmålaren er kommunen sin eigedom, om ikkje anna ordning er avtalt med kommunen. Vassmålar som skal nyttast som grunnlag for berekning av årsgebyr, blir betalt av kommunen. Målarar utover dette skal betalast av abonnenten. Installasjon av vassmålar skal betalast av abonnenten. Vassmålarar for internt bruk skal betalast av abonnenten.

Abonnenten skal lese av vassmålaren så nært tidspunkt for avrekning som mogeleg. Blir ikkje målaren lesen av, kan kommunen fastsetje årsgebyret etter skjøn. Kommunen kan òg krevje tilgang til vassmålaren for sjølv å lese av vassmålaren utan ytterlegare varsel til abonnenten.

Abonnenten skal halde målaren lett tilgjengeleg for avlesing og vedlikehald. Abonnenten skal føre tilsyn med målaren. Blir ein målar borte eller skadd, skal abonnenten straks melde ifrå til kommunen.

Kommunen har rett til å føre tilsyn med målarar. Kontrollør frå kommunen skal legitimere seg. Dersom målaren ved kontroll viser meir enn 5 % for høgt forbruk, har abonnenten krav på tilbakebetaling for feilmålinga.

Viser målaren meir enn 5 % for lågt forbruk, har kommunen krav på tilleggsbetaling.

Dersom vassforbruket til abonnenten har endra seg vesentleg frå siste målaravlesing, kan det avtalast nytt akonto beløp.

## Kapittel 7 Avsluttande føresegner

### § 16 Innkrevjing av gebyr

Forfalle krav på årsgebyr er sikra med pant i eigedomen etter § 6-1 i pantelova. Gebyra kan krevjast inn av kommunen etter reglar for innkrevjing av skatt.

### §17 Vedtaksmakt

Vedtak etter denne forskrifta er fatta av kommunestyret i Bjørnafjorden kommune.

### § 18 Klage

Når det blir fatta enkeltvedtak etter denne forskrifta, skal den/dei dette vedtaket gjeld, bli informert om den klageretten som er bestemt i Forvaltningslova. Klagen skal sendast til Bjørnafjorden kommune og klagefristen er 3 veker. Dersom klagen ikkje blir tatt til følgje, blir han sendt til den til ei kvar tid gjeldande kommunale klageinstans etter forvaltningslova § 28, 2. ledd, første setning. Denne instansen gjer endeleg vedtak.

Klage på gebyr utset ikkje betalingsfristen.

Utrekning av storleiken på gebyra, som følgjer direkte av det årleg fastsette  
gebyrregulativet, er ikkje enkeltvedtak og kan derfor ikkje klagast på. jf.  
Forvaltningslova kap. 7.

**§ 19 Iverksettjing**

Denne forskrifta trer i kraft når den er kunngjort i Norsk Lovtidend.

Frå same tid opphører Forskrift om vass- og avløpsgebyr i  
Bjørnafjorden kommune, fastsett av kommunestyret 17.12.2019.